

四庫全書

集部

欽定四庫全書

劔南詩藁卷三十三

宋 陸游 撰

立秋後四日雨

天為新秋故作涼  
海風吹雨入虛堂  
涼生庭樹陰陰綠  
潤襲簫衣浥浥香  
杯泛鸞兒供小歡  
碓舂雲子喜新嘗  
一年又見星橋近  
未信仙家日月長

夙興

老眼無眠覺夜長攬衣不復待窓光明星漸淡避初日  
秋露已濃生曉涼出草幽花紅紫雜穿林啼鳥去來忙  
是中有趣君知否喧寂年來已兩忘

存養堂為汪叔潛作

絳帳先生見處別少年立節如冰雪胸中凜凜萬卷書  
一字不為庸人說存心養性以事天人知不知渠晏然  
窮經日夜廢寢飯不怕諸生嘲腹便二旌五鼎俱忘想  
致一工夫在存養我今老病死即休未死尚欲從公講

感昔

三著朝冠入上都黃封頻醉渴相如馬慵立仗寧辭斥  
蘭偶當門敢怨鋤富貴尚思還此笏衰殘故合愛吾廬  
燈前目力依然在且盡山房萬卷書

又

五丈原頭秋色新當時許國欲忘身長安之西過萬里  
北斗以南惟一人往事已如遼海鶴餘年空羨葛天民  
腰間白羽凋零盡却照清溪整角巾

病稍平示兒輩

人與鴉俱曉天憑雁送秋極知生意盡彊為汝曹留藥  
餌傾殘橐風霜迫故裘倚屏搔短髮且復寄悠悠

野堂

野堂蕭颯雪侵冠歷盡人間行路難病馬不收烟草暝  
孤桐半落井牀寒長瓶濁酒猶堪醉敗篋殘編更細看  
此興不隨年共老未容城角動憂端

又

姓名無復世人聞  
靜處何妨獨策勲  
久矣不堪東閣客  
歸哉無愧北山文  
橫林霜近有丹葉  
平野雨餘多斷雲  
更喜鸕鷀來漸熟  
一溪烟水與中分

又

野堂地僻無車馬  
草徑柴門晝亦扃  
栗里雖貧儲舊粟  
玉川終老抱遺經  
病身凜凜殘秋葉  
故友寥寥欲旦星  
賴有吾兒堪暖眼  
夜闌常共一燈青

又

鼓缶酣歌樂太平野堂窓戶極疎明棄官正為愚無用  
謝客新緣病有名閒入鄉人賽神社時從長者放魚行  
驩然更有關心處打稻家家趁晚晴

七月下旬得疾不能出戶者十有八日病起有賦  
秋風吹海氛氣候頗不令昏昏七十翁擾擾半月病著  
書殊未成即死目不瞑扶持賴藥物僅得全性命雨添  
苔暈青風入桐枝勁深巷無人聲堵頤發孤詠  
夢有餉地黃者味甘如蜜戲作數語記之

有客餉珍草發奩驚絕奇正爾取嚼齧炮製不暇施異  
香透崑崙清水生玉池至味不可名何止甘如飴兒稚  
喜語翁雪頷生黑絲老病失所在便欲棄杖馬晨雞喚  
夢覺齒頰餘甘滋寄聲山中友安用求金芝

秋夜

燈欲殘時酒半消斷砧疎雨共無憀老來萬事渾非昔  
惟有詩情似灞橋

又



夜雨淒涼客思迷聞砧却是夢回時人人解說悲秋事  
不似詩人徹底知

病起憊甚有歎

殘年迫衰謝一病不枝梧書倩傍人讀行須稚子扶冥  
心付天地畢世釣江湖無米博佳傳虛名那可圖

小舟晚歸

扶病尋溪友忘憂泛釣槎渚寒無宿鷺月白有啼鴉敗  
壁青燈暗幽窓稚子譁無生未暇說且復議桑麻

又

秋晚吾廬好柴門映斷山潮生魚箔短木落雉媒閒  
堞蒼茫外漁舟浩蕩間客來常謝病老鈍耐嘲訕

夜坐

老眼清無寐孤懷默自傷思人交舊盡撫事歲時長  
籬犬吠殘月江楓凋早霜放翁殊耐事掩卷撥爐香

幽事

老夫病起日支離幽事關心只自知社近隣翁餽新釀

客歸童子拾殘碁功名已付來生了筆墨尤非晚歲宜  
餘習可憐除未盡移花引水伴兒嬉

病後衰甚非籃輿不能出門感歎有賦

酒興詩情尚自如形骸可怪頓成疎平生只倚雙鳬舄  
此日常須一鹿車寂寂豈惟慙鄧禹厭厭更覺類曹蜍  
晚窓弄筆聊湔袂數首清詩手自書

秋思

人生四十歎頭顱久矣心知負壯圖未死皆為閒日月

無求儘有醉工夫風凋木葉流年晚秋入窓扉病骨蘇  
信步出門湖萬頃季鷹不用憶蓴鱸

題村店壁

五十年来命壓頭即今殘髮不禁愁亂鴉陣起霜天晚  
落葉聲乾古渡秋小市歡醺聊兀傲長亭秣蹇得遲留  
一身自處窮如許幸是無因為國謀

病去

病去身差健秋高氣漸寒未甘常伏几時作一憑闌玉

粒炊粳軟香塵搗藥殘欣然顧兒輩燈下語團圓

白首

白首稱祠吏清時作幸民招呼林下客遊戲夢中身山路烏騾穩烟波畫櫓新村村有花柳無事即尋春

書病

乙卯七月二十二日卧病兩旬始平九月二日作此詩

莫年雖病不甚劇啜藥噉粥猶自力今年七月風眩作兒子在前不能識杯中藥冷呼不醒全家相顧無人色昏昏但思向壁卧蟲臂鼠肝寧暇恤醫巫技殫欲斂手

天高鬼惡吁莫測偶然得活出望外扶杖下床猶屢踣  
讀書心在目力短袖手堅坐到窓黑無功祿食四十年  
歎息此責何由塞

舍北晚眺

紅樹青林帶暮烟並橋常有賣魚船樊川詩句營丘畫  
盡在先生拄杖邊

又

日日津頭繫小舟老人自懶出門遊一枝筇杖疎籬外

占斷千巖萬壑秋

夜閱篋中書偶得李德遠數帖因思昔相從時所  
言後多可驗感歎有作

早歲傳聞月旦評殿門邂逅眼偏明當時一坐推談止  
今日叢林見話行老卧烟村身偶在夜開蠹紙淚如傾  
豈知三十餘年後河洛沙塵訖未平

予送德遠歸臨川  
詩有旰食煩明主

邊沙暗舊京之句頗為前  
輩所稱時紹興辛巳春也

登東山

漆園傲吏養生主栗里高人歸去來俱作放翁新受用  
不妨平地脫塵埃松崖壁立臨樵塢竹徑蛇蟠上欹臺  
送盡夕陽山更好與君踏月浩歌回

貧樂

蕭然曲肱地自號直心翁

淨名書云直心是道場

拙宦三災過勞

生一笑空新蔬經雨綠晚稻得霜紅飽食真無事浩歌

明月中

乙卯重九



九日村醅熟逢迎不用呼樽前狂起舞陌上醉相扶殘  
髮新霜白衰顏落葉枯明年何足問且復插茱萸

縱步近村

病去身輕試杖藜滿村麴麥正離離照溪自歎尚微瘦  
趁渡人言殊未衰草塞瓶頭沽濁酒花簪笠頂引羣兒  
衰回不恨歸差晚正愛青燈映竹籬

題齋壁

看盡人間利與名歸來始覺此身輕禍機不敗漁舟興

樂事渾輸地碓聲破篋雖無衣可典寒畦已有芋堪烹  
餘年且健貧何害剩與隣翁醉太平

范參政挽詞

屢出專戎閫端歸上政途勲勞光竹帛風采震羌胡  
籤帙新藏富園林勝事殊知公仙去日遺恨一毫無

又

孤拙知心少平生僅數公凋零遂無幾遲莫與誰同  
瓊樹世塵外神山雲海中夢魂寧復接慟哭向西風

病後往來湖山間戲書

周公居東三食新夷吾在魯丘厄陳聖賢憂患尚如此  
況我本是羈窮人今秋危病輒不死餘業自笑堅頑身  
結茅所幸得佳處石帆天鏡無纖塵捫蘿峭壁上采藥  
腰斧長歌行負薪尋僧獨泛若耶月攜友共采湘湖蓴  
蠡亡範金陋勾踐斯頌刻石憎羸秦不如一酌禹祠去

惡衣菲食真吾鄰

禹祠在吾廬  
東南十餘里

秋夜遣懷

六年歸卧水雲鄉本自無閒可得忙  
羸病豈知身尚健  
迂疎真與世相忘  
霜清水落年華晚  
月黑梟鳴夜漏長  
瑣瑣井蛙何足計  
一篇秋水笑蒙莊

初冬暄甚

吳中十月雪霜慳風景暄妍葉未殷  
杲日還看浴東海  
薄雲不解冒南山  
蛙鳴閣閣荒池曲  
蠅出營營食案間  
安得玄冥正時令  
紅爐綠酒一開顏

贈湖上父老十八韻

一鏡三百里環以碧玉峯天公賜我厚極目為提封烟  
收見石帆雨霽望卧龍嵯峨寶林塔迢遞天章鍾興來  
思一出霜晴及初冬父老捨杖迎衣冠頗嚴恭語我相  
識久幸未棄老農間者傳伏枕喜聞足音楚貧舍有盤  
飧勿責異味重麴麴新油香黍酒甕面濃已遣買撲握  
亦可致噉嚼願公領此意秣蹇聊從容我起為太息厚  
意敢不從吾生行逆境平地九折邛况今又老退如子  
豈易逢但願從今健衰疾緩見攻遇興即扣門草具煩

炊春但恐乘月來妨子睡味濃

初冬感懷二首

落葉掃還積斷鴻飛更鳴羸軀得霜健老眼向書明水  
瘦河聲壯其枯馬力生竟為農父死白首負功名

又

庭蕪失故綠園樹染新丹病思閒支枕詩情獨倚闌帶  
移頻覺瘦貂敝不禁寒惟有牆陰薺離離又滿盤

讀杜詩

城南杜五少不羈意輕造物呼作兒一門酣法到孫子  
熟視嚴武名挺之看渠曾次隘宇宙惜哉千萬不一施  
空回英槩入筆墨生民清廟非唐詩向今天開太宗業  
馬周遇合非公誰後世但作詩人看使我撫几空嗟咨

記九月三十日夜半夢

一夢邯鄲亦壯哉沙隄金轡絡龍媒兩行畫戟森朱戶  
十丈平橋夾綠槐東閣羣英鳴佩集北庭大戰捷旗來  
太平事業方施設誰遣晨雞苦喚回

小舟遊近村捨舟步歸

數家茅屋自成村  
地碓聲中晝掩門  
寒日欲沉蒼霧合  
人間隨處有桃源

又

借得漁船泝小溪  
繫船浦口却扶藜  
莫言村落蕭條甚  
也勝京塵沒馬蹄

又

不識如何喚作愁  
東阡南陌且閒遊  
兒童共道先生醉



折得黃花插滿頭

又

斜陽古柳趙家莊負鼓盲翁正作場死後是非誰管得  
滿村聽說蔡中郎

蜀僧宗傑來乞詩三日不去作長句送之

看徧東南數十州寄船却泝蜀江秋孤雲兩角山亡恙

斗米三錢路不憂

今年所在皆大稔

萬里得詩長揖去他年挈

笠再來不放翁爛醉尋常事莫笑黃花插滿頭

義農

義農去不反釋老似而非太息衆皆醉逝將誰與歸經  
時忘肉味盡日掩柴扉安得同心者燈前語造微

冬夜不寐

老眼睡眠少空村霜露淒錚錚聞叩鐵喔喔數鳴雞月  
入知窓破衾單幸屋低明晨炊米盡吾起不容稽

十月

塞向傾書檯開爐積豆其林居得溫煖天遣養衰遲甕

盜藏疏後鉏耰下麥時農家冬最樂我老頗能知

讀易

羸軀抱疾時時剝白髮乘衰日日增淨掃東窓讀周易  
笑人投老欲依僧

又

老喜杜門常謝客病惟讀易不迎醫冬來更愧乖慵甚  
醉過收蕎下麥時

聞雁

霜高木葉空月落天宇黑  
哀哀斷行雁來自關塞北  
江湖梁少念汝安得食  
蘆深洲渚冷歲晚霰雪逼  
不知重雲外何處避畢弋  
我窮思遠征羨汝有羽翼

### 悲歌行

士如天馬龍為友雲夢胸中吞八九  
秦皇殿上奪白璧項羽帳中撞玉斗  
張網本不問狐狸董龍何足方雞狗  
風埃蹭蹬不自振寶劍床頭作雷吼  
憶遇高皇識隆準豈意孤臣空白首  
即今埋骨丈五墳骨會作塵心不朽

胡不為長星萬丈掃幽州胡不為昔人圖復九世讐封  
侯廟食丈夫事齷齪生死真吾羞

村飲

吳中賈霜晚冬草有未衰坐令老病叟遂失凋年悲翩  
翩烏紗帽裊裊殘菊枝雖無車馬客時與隣翁期新醅  
壓尚渾雉兔亦及時自覺勝淵明但醉不賦詩

鏡湖西南有山曰外山民某氏居之其居少西小

潭受飛泉羣山環合真異境也為作短歌

漢東九十九重岡武都九十九脉泉豈如君家環翠阜  
小潭珮玦聲鏘然我欲從君乞菴地開軒下看泉中天  
金丹九轉太多事服水自可追飛仙雲孫相遇不相識  
笑問塵世今何年掬泉弄月清歛罷却折玉井秋風蓮  
十月十七日予生日也孤村風雨蕭然偶得二絕  
句予生淮上是日平旦大風雨駭人及予墮地  
雨乃止

少傅奉詔朝京師機船生我淮之湄宣和七年冬十月

猶是中原無事時

又

我生急雨暗淮天  
出沒蛟鼉浪入船  
白首功名無尺寸  
茅檐還聽雨聲眠

遊山舟中遇風雨戲作

龍驤萬斛去如鴻  
巨浪惟能窘短篷  
不是山靈嫌俗駕  
一生常值打頭風

一齒動搖似不可復留有感

晚境常憂豁可憎  
苦留終不受丁寧  
主貧何恨客辭去  
木老元知葉自零  
未害朶頤臨肉俎  
但妨叩齒讀仙經  
從今有酒須勤買  
莫學騷人要獨醒

### 山行

老翁七十亦何求  
尚賴山行散百憂  
擻耳帽寬新小疾  
獨轆車穩正閒遊  
酒旗滴雨村場晚  
茶竈炊烟野寺秋  
若論人間長久事  
高吟何啻傲封侯

### 老學菴

予取師曠老而學如秉燭夜行之語名菴



窮冬短景苦匆忙老學菴中日自長名譽不如心自肯  
文辭終與道相妨吾心本自同天地俗學何知溺粃糠  
已與兒曹相約定勿為無益費年光

枕上偶成

放臣不復望修門身寄江頭黃葉村酒渴喜聞疎雨滴  
夢回愁對一燈昏河潼形勝寧終棄周漢規模要細論  
自恨不如雲際雁南來猶得過中原

舍北閒望作六字絕句

潘岳一篇秋興李成八幅寒林舍北偶然倚杖盡見古  
人用心

題菴壁

竹間僅有屋三楹

小巷纔  
兩間

雖號吾廬實客亭已斷雨聲

重點滴欲殘燈影更晶  
熒酒惟排悶難中聖茶却名家  
可作經頭眩減來還病寒何時徹底得康寧

又

身似蝸牛麤有廬却緣無用得安居  
地爐封火欺寒雨

紙閣油窓見細書  
麪熟山僧分餽飢  
船來溪友餉薪樗  
閉門莫笑衰頽甚  
讀易論詩亦未疏

縱筆

老眼輕千乘  
枯腸却八珍  
直令身潦倒  
未害膽輪囷  
酒裏遺浮世  
書中見古人  
平生笑園綺  
老蹋帝城塵

又

壯歲志天下  
崎嶇無一施  
高談對隣父  
朴學付癡兒  
補柵憐雞冷  
分糧憫雀飢  
吾生忽至此  
惆悵鏡中絲

又

天道何時定人生固有涯壯年行出塞晚歲病還家積  
憤憑誰豁孤忠祇自嗟今朝茅屋底隱約聽霜笳

十月二十八日夜雞初鳴時夢與數女仙遇其一  
作詩示予頗哀怨如人間語惟末句稍異予戲  
之曰若無此句不可為神仙矣其一從傍戒曰  
汝當勿忘此規作詩者甚有愧色予頗悔之既  
覺賦兩絕句以解嘲

玉妹眉黛翠連娟弄翰閒題小碧牋人世愁多無著處  
故應分與藥宮仙

又

虹作飛橋蜃吐樓羣仙來賦海山秋玉妹定自多才思  
更與人間替說愁

山行

緣崖曲曲羊腸路傍水疎疎麕眼籬舉起短鞭成一笑  
吾詩正是策勲時

又

眼邊處處皆新句  
塵務經心苦自迷  
今日偶然親拾得  
亂松深處石橋西

貧甚作短歌排悶

閒何濶  
逢諸葛畏人常憂不得活  
事不諧問文開不蹋  
權門更可哀  
即今白髮如霜草  
一飽茫然身已老  
惟有躬耕差可為  
賣劍買牛悔不早  
年豐米賤身獨飢  
今朝得米無薪炊  
地上去天八萬里  
空自呼天天豈知

過張王行廟

烈士生不遇栖栖為旅人英魂死不沒凜凜為明神明  
神受帝命廟食福我民牲酒何足言壓抑姑少伸火旱  
千里赤與人下雷雨澤水不反壑談笑出平土善人錫  
之福姦偽亦擊汝豈若世上人吞聲氣如縷

秋月曲

舊時家住長安城萬戶千門秋月明紫陌朱樓歌吹海  
酣宴不覺銀河傾受降城頭更奇絕莽莽平沙千里月

選兵夜出打番營鐵馬蹴冰冰欲裂塞月未落成功回  
腰鼓橫笛如春雷長安高樓豈不樂與此相去何遼哉  
丈夫志在垂不朽漆胡骷髏持飲酒舉頭雲表飛金盤  
痛飲不用思長安

即事

蕭騷白髮滿綸巾猶是人間詩酒身湖上悲秋新有作  
眼邊敗意絕無人稻梁栖畝雁初下烟水粘天鷗自馴  
堪笑推移成老大時時几杖接鄉鄰



悲歌行

感慨常自悲發為窮苦辭偏仄不少伸夢中亦酸辛脂  
車思遠道太息令人老中原宋興圖憂亂苦如荼此責  
在臣子諸公其可已談笑復舊京令人憶西平

讀李泌事偶書

華渭當時已誤來商山芝老更堪哀人生若要常無事  
兩顆梨須手自煨

晨起

晨起梳頭懶披衣立草堂霧昏全隱樹氣暖不成霜灘  
急回魚隊天低襯雁行新春猶一月已覺日微長

喜雨

一秋未雨冬未雪坐使肺肝生客熱不惟裘褐藏篋笥  
卧毯坐氍俱未設樽中有酒不敢嘗小甕黃齏却時啜  
新春距今一月爾便恐蝗生殘宿麥天公老手正可人  
夜雨蕭蕭洗旱塵北風吹雪定不晚喜入三山湯餅碗

閒趣

堅閉門來又過冬一裘且復擁龍鍾不辭陋巷如漿冷  
自愛新醅似粥釀迎婦橋邊燈煜煜賽神林外鼓鼕鼕  
豈惟自得閒中趣要遣兒孫世作農

自警

人生非金石壽夭不自知一日復一日亦或至耄期方  
其未死間早夜勿自欺嗟彼陷溺者太山起毫釐努力  
戒惰偷堯舜可庶幾我今齒髮弊彊健復幾時一寸學  
古心自視猶可為雞鳴推枕起為善亦孳孳天定終勝

人吾世或未衰素業果有傳三復吾此詩

雨後

鏡湖歸隱老黃冠布褐蕭然一室寬  
燈影青荧人未睡雨聲點滴夜將闌  
四朝出處朋儕盡半世漂流骨相寒  
青史無名端可恥著書留與後人看

又

蕭蕭殘髮雪侵冠冉冉清愁用底寬  
把卷昏眸常欲閉投牀睡興却先闌  
惟須酒沃相如渴未分人哀范叔寒

雨霽定知梅已動  
佩壺明日試尋看

窓黑

風雨窓常黑  
衰翁罷讀書  
縱橫慙七畧  
廢惰失三餘  
宴坐工夫熟  
多聞習氣除  
韓公未解此  
誤謂腹空虚

雨止行至門外戲作

簷雨收殘滴  
溪雲弄晚晴  
出門還浩歎  
幾屐了吾生

野飲

綠岸波生滌麴塵  
碧天雲細感魚鱗  
山居剩得舒長日

野飲自無拘忌人

元結詩云坐無拘忌人勿限醉與醒

酒甕石邊孤店晚

樵風溪畔早梅春懷章正可驚奴輩未勝行歌獨負薪

雨夜有懷張季長少卿

放翁雖老未忘情獨卧山村每自驚鼎鼎百年如電速  
寥寥一笑抵河清梅初破藟行江路燈欲成花聽雨聲  
正用此時思剗飲故交零落愴餘生

雨中熟睡至夕

擁爐聽雨生睡思澀眼昏昏惟欲閉丈夫少壯要自力

飽食養慵真可媿我今不睡欲何為常恐兒曹落吾事  
蠻獐紙帳方施行五鼎八珍無此味

又

少陵今雨無客至寂寞衡門晝常閉孝先酣枕夢周公  
弟子雖嘲可無媿世上紛紛榮辱多不如睡中差省事  
小兒忽報煎茶熟起擁寒爐究餘味

憶昔

憶昔輕裝萬里行水郵山驛不論程屢經漢帝燒餘棧

曾宿唐家雪外城，壯志可憐成昨夢。  
殘年惟有事春耕，西窓忽聽空階雨。  
獨對青燈意未平。

燈下看梅

風雨經旬怯倚闌，梅花折得就燈看。  
有情應寄去年別，無寐不禁清夜寒。  
病起揜筇幽興在，春遲載酒後期寬。  
籬東數樹尤奇絕，日遣蠻童候路乾。

程泰之尚書挽詞

文古唐元結，經明漢仲舒。  
三朝八座貴，千載九丘書。  
早



接遊從末常聞議論餘死生今永訣追恨寄聲疎

又

昔在紹興末同趨行殿門方思尋宿好忽已奉遺言誄  
行曲臺議飾終明主恩高皇舊朝士今復幾人存

雨夕獨酌書感

數掩蘆藩常不開飢鴉兩兩啄青苔雨來十日未成雪  
歲盡一枝初見梅池上晚行攜獨鶴燈前夜酌撥新醅  
漁村老景今如許駿馬舊遊安在哉

白首


白首元無一事成朝來大笑絕冠纓花飛早已知春減  
漏盡寧容更夜行蕭散且為無算飲猖狂未免不平鳴  
玉關青海今安在麥野桑村送此生

客言来自上臯道中以其語作一絕

日曬霜融作淺泥酒家却在斷橋西五陵今代無豪俠  
獨卧茅簷聽午雞

睡起

老怯年華速閒知晝漏長已回酣枕夢未過古匱香洗  
面宮眉綠開茶帶胯方山家風味在雖病意差彊



劔南詩藁卷三十三

# 欽定四庫全書

集部

劔南詩藁卷三十五

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷三十四

宋 陸游 撰

歲暮

案間官歷喜更端  
鬢畔羅幡巧耐寒  
篩辣擣香芻臘酒  
添紅絲綠簇春盤  
衰容未覺餘年迫  
佳日猶思一笑歡  
太息兒童癡過我  
鄉儂雖陋亦爭看

殘臘二首

破臘春先到微陰日易醺鳥聲猶寂寂木意已欣欣雲  
起山分疊風生水感紋斷腸何處笛偏向醉中聞

又

殘臘無多日吾生又一年林塘明夕照墟落淡春烟山  
色危欄角梅花綠酒邊歲時元自好老病獨悽然

一壺歌

悠悠日月沒根株常在人間醉一壺傾倒欲空還潑灑  
不曾教化不曾沽

又

先生醉後即高歌千古英雄奈我何  
花底一壺天所破  
不曾飲盡不曾多

又

自從軒昊到隋唐幾見中原作戰場  
三十萬年如電掣  
不曾記得不曾忘

又

恥從岳牧立堯庭況見商周戰血腥  
攜得一壺閒處飲

不曾苦醉不曾醒

又

長安市上醉春風  
亂插繁花滿帽紅  
看盡人間興廢事  
不曾富貴不曾窮

屬疾

白頭屬疾卧丘園  
藥物枝梧且僅存  
月黑淺山聞鵬嘯  
窓明高樹送鴉翻  
讒欺薄命深消骨  
憂集窮途黯斷魂  
回視少時真隔世  
但餘一念在元元



新歲

風入鞭梢緊春從草色深山坡卧新犢園木轉幽禽勲  
業少年夢關河游子心爾來都掃盡濁酒帶醅斟

早春

數聲屋角聽鳴禽紅糝青梢忽滿林雨過東皋一犁潤  
冰消南澗半篙深逢僧竹院閒評藥攜鶴山村醉擁琴  
青史功名黃閣貴有時應不到如今

太古

太古安知處與堯茹毛飲血自消搖不須追咎為書契  
初結繩時俗已澆

春夜

老慙生如寄春寒夢亦孤燈花時自墜梟語迭相呼萬  
里書難得三年病未蘇窓深不知曉但覺動林烏

正月六日作

上天四序分寒燠以漸相尋不相瀆今年立春七日耳  
暖景溫風何迫促羣蛙怒鳴蚊蚋出虻蜉插翅飛滿屋

兒童便欲覓團扇我亦汗垢思湯沐山坡梅花常恨晚  
一夕開盡如雪谷籬邊已放桃藥紅庭下頓長萱芽綠  
小人識淺喜欲舞輕衫冷麤相追逐春深癘鬼不貸人  
此暖但憂非汝福

寄題吳斗南玩芳亭

北斗以南有吳侯人物知非第二流讀書不放一字過  
閉戶忽驚雙鬢秋平生離騷讀千遍屈泥秭歸要親見  
歸來落筆愈驚人宋玉景差俱北面玩芳亭中蘭茝芳

朝回解帶春晝長愛君憂國有奇作坐令壯觀還沅湘  
老夫曩亦同此趣甚欲閒題玩芳句無奈生涯今已別  
倒壺枯楠忘歲月

春初驟暄一夕梅盡開明日大風花落成積戲作  
暖逼梅花爛漫開飄零便恐付蒼苔更堪連夜風如許  
似妒愁人把一杯

又

殘梅零落不禁吹真是無花空折枝堪笑老人風味減

三年不作送梅詩

予往歲多有送梅之作今閏筆已累年

又

年年爛醉萬梅中  
吸酒如鯨到手空  
花欲過時常惜別  
今年此別更怱怱

讀老子傳

巍巍闕里與天崇  
禮樂詩書萬世宗  
但說周公曾入夢  
寧於老氏歎猶龍

示元用

德孫學語已驚人  
悶裏時時一笑新  
老子已應如櫪驥  
此郎端恐是天麟  
會看神授如椽筆  
莫改家傳折角巾  
汝叔不癡當愛汝  
夜窓燈火勉相親

春思

七十老翁身退耕  
可憐未減舊風情  
典衣取酒那論價  
秉燭看花每到明  
江浦時時逢畫櫂  
寺樓處處聽新鶯  
此生無復陽關夢  
不怕樽前唱渭城

春望

天地回春律山川掃積陰波光迎日動柳色向人深  
霑灑憂時淚飛騰滅敵心人扶上危榭未廢一長吟

丙辰上元前一日

弊裘破帽髮鬅鬢宛似山房罷講僧身病不禁連夜雨  
家貧只挂舊年燈修椽柳外掀樓角危檻雲間露塔層  
自笑閒遊本無定興闌隨處倚枯藤

夜雨思枯蒼遊

道心退惰如風鷁世念堅彊似火牛安得短篷湖海去

夜深聽雨琵琶洲

春陰

麴塵柳色正遮門  
石黛江流曲抱村  
小院春光方盎盎  
遠山雨氣又昏昏  
傍簷林鳥驚幽夢  
極目烟蕪捲燒痕  
只道餘寒尚如許  
不知生意滿乾坤

寒夜歌

陸子七十猶窮人  
空山度此冰雪晨  
既不能挺長劍以  
扶九天之雲又不能持斗魁以回萬物之春  
食不足以



活妻子化不足以行鄉鄰忍飢讀書忽白首行歌拾穗  
將終身論事情叱目若炬望古踴躍心生塵三萬里之  
黃河入東海五千仞之太華磨蒼旻坐令此地沒羌戎  
兩京宮闕悲荆榛誰施赤手驅蛇龍誰恢天網致鳳麟  
君看煌煌藝祖業志士豈得空酸辛

正月十六日園中偶賦

又向柴荆過上元豪華前事不須論偶逢花發閒持酒  
不得人扶嬾出門薄技號山曾獻玉榮途添指亦嘗龜

年來洗盡東陵夢  
瓜壑蕭蕭老故園

陵霄花

庭中青松四無鄰  
陵霄百尺依松身  
高花風墮赤玉盞  
老蔓烟濕蒼龍鱗  
古來豪傑人少知  
昂霄聳壑寧自期  
抱才委地固多矣  
今我撫事心傷悲

懷舊

鶴鳴山下竹連雲  
鳳集城邊柳映門  
當日不知為客樂  
如今回首却消魂

又

駿騾西過雨漫天千里江山在眼邊二十四年如昨夢  
憑誰問訊帶枷僊

又

狼烟不舉羽書稀幙府相從日打圍最憶定軍山下路  
亂飄紅葉滿戎衣

又

翠崖紅棧鬱參差小益初程景最奇誰向豪端收拾得

李將軍畫少陵詩

又

回龍寺壁看維摩最得曹吳筆意多  
風雨塵埃昏欲盡  
何人更著手摩挲

又

嶓冢山頭是漢源故祠寂寞掩朱門  
擊鮮藉草無窮樂  
送老那知江上村

夜坐

蓬窓夜半竹騷然坐守殘編悄不眠  
辛苦空成左傳癖  
逍遙常愧大慈僊風寧可繫功名  
誤日不能黏歲月遷  
明旦覓船湖上去西村桃李淡春烟

入城舟中作

櫂邊蘸岸接藍水蓬外橫空破墨山  
更著灘頭一行鷺  
此身真在畫圖間

寓蓬萊館

朱門高柳畫橋南掠面風埃喜解驂  
霽日偶逢春盎盎

野人不慣屋潭潭堂中剩喜簪裾集樓上時聞鼓角酣  
明發扁舟覓歸路趁時吾欲事農蠶

過能仁光孝寺欲訪昕老會府中速客遂不果入  
春日城南過寶坊馳驅不得駐車箱高門臨道淨如拭  
傑屋凌空勢欲翔齋近鐘魚初送響風微松檜自生香  
暫來堪笑忙如許坐羨高人白晝長

夜二鼓留西城門歸三山

秉炬夜離驛戴星出西關舟人飛畫檝門鎖響銅環漁

大明遙浦溪風解醉顏鄰家亦驚起迎我笑堅頑

讀杜詩

千載詩亡不復刪少陵談笑即追還常憎晚輩言詩史  
清廟生民伯仲間

蘇韜光節推挽歌詞

才名京兆掾門閥魏公孫遇事雖骯髒接人終靜溫寧  
吟灞橋雪不掃舍人門二妙凋零盡衰翁慨獨存

韜光與訓

直吏部下世

相距三年

長安詩集

劔南詩集

十

村翁

放翁真箇是村翁  
釣渭耕莘事不同  
蹴蹋烟雲兩芒屨  
憑陵風雪一蓬籠  
屢經駭浪身終免  
遍閱浮漚壽未窮  
幸有春衣堪換酒  
道邊醉卧示神通

寄子布

釣灘耕壟雪盈簪  
從入新年病至今  
遠使有書常灑淚  
長宵無夢更傷心  
何由老眼迎歸櫂  
空為秋風感暮砧  
一紙新詩千萬恨  
臨風悵望獨長吟



落花

朱朱白白不禁吹老未忘情作許悲瑞錦已殘猶有夢  
明霞初散可無詩人應偷樣傳圖本天亦收香付蜜脾  
榮悴相尋君看取曉來青子已團枝

南窓

身輕婚嫁畢耳靜市朝疎褫帶脫烏幘一窓寬有餘

排悶

白髮無端日日新自憐猶作百憂身孤燈聽雨常終夜

一榼尋花又送春  
旋壓麥饒邀父老  
時分菜把餉比鄰  
不須頻起陳人歎  
已是清朝六世民

過隣家戲作

老脫朝冠岸幅巾  
時時乘興過比鄰  
瓶無儲粟吾猶樂  
步有新船子豈貧  
醅甕香浮花露熟  
藥欄土潤玉芝新

玉芝謂鬼臼  
山家多有之

相從覓笑真當勉  
又過浮生一歲春

看花

好樹典衣買新花  
扶杖看村醪  
雜清濁山果半甘酸  
家

事貧尤簡詩情老未開  
鷓鴣閒似我日暮立清灘

閒趣

同儕零落曉星稀  
久住人間豈自期  
衰病已成垂白叟  
春寒又到牡丹時  
溪邊喚客閒持釣  
燈下留僧共覆棋  
一日轉頭還過却  
紛紛世事不須知

春盡遣懷

裊裊爐香晝掩扉  
殘年真是解塵鞿  
青飡旋擣通隣好  
白葛新裁製暑衣  
避日小魚穿藻去  
倚風輕燕拂簾飛

要知名宦非初意三十年前已念歸

子以乾道乙酉卜築湖上今三十有

二年

矣

## 二友

清芬六出水梔子堅瘦九節石菖蒲放翁閉門得二友

千古夷齊今豈無

## 半丈紅盛開

滿酌吳中清若空共賞池邊半丈紅老子通神誰得似

短筇到處即春風

感事

雞犬相聞三萬里  
遷都豈不有關中  
廣陵南幸雄圖盡  
淚眼山河夕照紅

又

堂堂韓岳兩驍將  
駕馭可使復中原  
廟謀尚出王導下  
顧用金陵為北門

又

渭上晝昏吹戰塵  
橫戈慷慨欲忘身  
東歸却作漁村老

自誤青春不怨人

又

捫蝨當時頗自奇  
功名遠付十年期  
酒澆不下胸中恨  
吐向青天未必知

豐年行

南村北村春雨晴  
東家西家地碓聲  
稻陂正滿綠針密  
麥隴無際黃雲平  
前年穀與金同價  
家家涕泣伐桑柘  
豈知還復有今年  
酒肉如山賽春社  
吏不到門人晝眠

老穉安樂如登仙  
縣前歸來傳好語  
黃紙續放身丁錢  
四月一夜漏欲盡  
起坐達旦

春歸不可留  
斗柄已崢嶸  
老至不可却  
雪鬢森千莖  
少年所讀書  
廢忘如隔生  
舊交死欲盡  
存者萬里程  
高談無與發  
欲語輒吞聲  
悠悠一飽計  
泯泯千載名  
迹將山丘歸  
不見河雒清  
挑燈坐待旦  
攬筆哀涕傾

蓬萊行

山峭插雲海樓高入烟霄  
不知何宮殿東望鬱岩堯是

時青童君初散通明朝風濤中破裂涌出黃金橋授我  
玉芝房服之塵念消凡骨一朝換八極坐可超

馮縣丞挽歌詞

鋼字  
仲柔

尊公同故里季父接周行晚憇烏衣巷重逢玉樹郎名  
流多賞識榮路正騰驤愁絕河梁上風烟莫莽蒼

幽居初夏

湖山勝處放翁家槐柳陰中野徑斜水滿有時觀下鷺  
草深無處不鳴蛙籜龍已過頭番筍木筆猶開第一花



歎息老來交舊盡睡餘誰共午甌茶

又

藤冠草屨病支離門外紛紛百不知解籜有聲驚倦枕  
飛花無力點清池閒思舊事惟求醉老感流年只自悲  
綠樹陰中紅練起一團零亂濕臙脂

又

長歌嫋嫋插秧天小繖翻翻入市船高棟巢乾初乳燕  
綠槐陰密已鳴蟬只言末俗人情惡未廢先生日晏眠

推枕起來閒弄筆銅蟾手自挹寒泉

又

鬢毛禿盡齒牙疎難受人間折簡呼詩酒本來無藉在  
形骸况復不枝梧槐陰漸密能鄣日池水新生可浴鳧  
移得太行終亦死平生常笑北山愚

出蜀十九年故交零落殆盡慨然有作

西遊邂逅得諸君落筆千言酒百分聚散亦知元有數  
死生豈料不相聞平羌空憶吟江月小益何由度棧雲

一事與君聊自慰兒曹或可付斯文

憶天彭牡丹之盛有感

常記彭州送牡丹祥雲徑尺照金盤豈知身老農桑野  
一朵妖紅夢裏看

五月七日夜夢中作

征行過孤壘寂寞已千年馬病霜管瘦孤鳴古冢穿烟  
塵身欲老金石志方堅零落英雄盡何人共著鞭

又

霜露薄貂裘連年塞上留蘆花青冢月鐵馬玉關秋振  
臂忘身憊憑天報國讐諸公方衮衮好運幄中籌

急雨

急雨清風發土香靈臺如受寶犀涼華胥一枕遽然覺  
却聽蟬聲送夕陽

夜中步月

夜半不成寐起尋微月行風生驚葉墮露重覺荷傾兀  
兀酒中趣悠悠身後名興闌還掩戶坐待日東生

晨起

齒豁不可補髮脫無由栽  
清晨明鏡中老色蒼然來  
餘年亦自惜未忍付酒杯  
抽架取我書危坐闔復開  
萬世見唐堯夔龍獲親陪  
寥寥三千年氣象挽可回  
豈以七尺軀顧受世俗衰  
道在無不可廊廟均蒿萊

枕上聞布穀聲

老去惟思日月遲更堪青鬢  
捻成絲無端催取流年去  
最恨溪頭布穀兒

雨夜

北風吹雨亂疎鐘  
寂寂燈花破碎紅  
孤夢正行天一握  
高城俄報鼓三通  
衰遲空抱屠龍技  
豪俊誰收汗馬功  
但願輿圖早來復  
白頭敢望起雲中

孤雲兩角去天一握蓋褒斜道上也

焚黃

啼呼梨棗憶兒時  
駒隙頻經日月馳  
早歲已興風木歎  
餘生永廢蓼莪詩  
燎黃恩重空垂泣  
戴白身存敢自期  
足蹇僅能成拜起  
籃輿歸路不勝悲

即事

陶令常耽酒，龐翁不出家。  
安貧炊麥飯，省事嚼茶芽。  
池滿浮雛鴨，庭荒噪渴蛙。  
詩成賞音絕，自向小兒誇。

失鵝鵝

不見池邊整羽衣，繞村散覓走羣兒。  
卑飛正恐為人得，徑去何須報我知。  
久憶蘋洲應自喜，尚餘菰米亦堪悲。  
放翁未到忘情處，日暮憑欄獨詠詩。

贈童道人蓋與予同甲子

吾儕之生乙巳年達者寥寥窮比肩退士一生藜藿食  
散人萬里江湖天忍貧不變我自許挾術自營君豈然  
一事尚須煩布策幾時能具釣魚船

方謀買一小舟未得也

上方銛老求宿蘆詩宿蘆蓋所寓室名以其似漁  
舟也

一曲亭前水接天放翁短棹弄風烟宿蘆縱有江湖趣  
猶是人間贗釣船

夜坐園中至夜分



岸巾閒倚胡牀坐步屨還扶拄杖行漸近秋清知病減  
盡捐世界覺心平翻翻雙鵲風枝爽熠熠孤螢露草明  
更欲裴回盡幽興麗譙傳漏報三更

六月二十四日夜分夢范至能李知幾尤延之同

集江亭諸公請予賦詩記江湖之樂詩成而覺  
忘數字而已

露著霜筠纖短蓬飄然來往淡烟中偶經菱市尋谿友  
却揀蘋汀下釣筒白菡萏香初過雨紅蜻蜓弱不禁風

吳中近事君知否團扇家家畫放翁

晨起

月淡知將曉風清喜近秋  
狂吟詞跌宕新沐髮颼颼  
桐葉危先墮蟬聲斷更道  
達生隨處樂自笑替人愁

村飲示鄰曲

七年收朝迹名不到權門  
耿耿一寸心思與窮友論  
憶昔西戍日孱敵氣可吞  
偶失萬戶侯遂老三家村  
朱顏捨我去白髮日夜繁  
夕陽坐溪邊看兒牧雞豚  
雕胡幸

可炊亦有社酒渾耳熱我欲歌四座且勿喧即今黃河  
上事殊曹與袁扶義孰可遣一戰洗乾坤西酹壯士墓  
南招名將魂干戈從此戢永定宋中原吾儕雖益老忠  
義傳子孫征邊詔儻下從我屬橐韃

醉歸

十畝春蕪手自犁瓜牛廬在鏡湖西禪心每笑彈碁局  
道眼長捐刮膜篋絕食就官分鶴料無車免客笑雞栖  
頃獨有一竹  
與今亦壞矣  
旗亭酒賤秋風近夜夜歸來醉似泥

二愛 并序

陶淵明詩云孟夏草木長遶屋樹扶疎衆鳥欣  
有託吾亦愛吾廬孟東野亦云遠岸雪難莫勁  
枝風易號霜禽各嘯侶吾亦愛吾曹予暇日詠  
二詩有感作二愛詩

結屋不袤丈著身還有餘破壁作小窓亦足陳吾書無  
酒當飲水無肉當飯蔬知止乃不殆此語良非虛古人  
造道處正自無絕殊願君勿他求且復愛吾廬

又

門外秋水深日日集鷗鷺是豈相與期正以同類故殘  
年過七十朋舊半丘墓非吾濟世心歎息莫予助人生  
非金石去日如脫兔三復東野詩獨立悲歲莫

蜻蜓浦

舍北蜻蜓浦新秋偶一來菱絲烟際老芡觜露中開漁  
火明還滅沙禽去却回吾行興無盡舟子莫相催

題韓運鹽竹隱堂絕句三首

茂卿字  
立道

鄴下王孫今勝流  
相逢三伏凜生秋  
未嘗一日可無竹  
似是前身王子猷

又

塵埃車馬日駸駸  
誰解從君一散襟  
待我清秋有閒日  
抱琴來寫萬龍吟

又

靜處知君解策勲  
爐香裊裊起微雲  
岸巾不住尋青士  
欹枕還應對墨君

哭杜府君

叔高初過我風度何玉立超然衆客中可慕不待揖入  
都多賓友伯高數來集質如琮璧潤氣等芝蘭襲晚乃  
過仲高午日曬行笠忽忽遽別去悵望空快悒有如此  
三高青紫何足拾豈無知之者相視莫維繫窮魚雖相  
憫可愧吐微濕亦知尊公賢何止蓋鄉邑向風每拳拳  
識面真汲汲秋風忽聞訃執書歎以泣造門不自決追  
悔今何及又聞著書富手澤溢巾笈哀毀要無益遺稿

勤綴緝

卷三十四

初秋夜坐

徂歲又如許吾生真若浮  
露蟬鳴達曉風葉墮先秋  
野迴星辰大天空河漢流  
胡床幸亡恙且復寄悠悠

宴坐自午至莫

身外寥寥掃怨恩胸中浩浩納乾坤  
飽經世事常高枕慣見人情不署門  
孤日夜分生海底百川秋漲汧河源  
珥貂碧落從來事東訪蓬萊不足言



舟中詠落景餘清暉輕橈弄溪渚之句蓋孟浩然  
耶溪泛舟詩也因以其句為韻賦詩

獨鶴還故鄉歸然但城郭出門無與遊所至苦寂寞裏  
飯事幽討此計殊不惡薄莫宿漁家蒼烟帶墟落

又

維舟入谷口信步造異境隔離雞犬聲滿地梧楸影瓦  
甌炊香稻石泉汲新井人間苦徧仄愛此須臾景

又

老圃髮如霜見客能廢鋤與坐使之年自云八十餘老  
身六朝民草舍數世居力守遠祖言一字不學書

又

沿溪得茅店酒旗出柴荆杖頭錢已空一醉何由成主  
人語鄭重手把甕面清勸我姑小留溪魚亦可烹

又

秦皇酒甕邊古有釣魚磯我來必竟日時挈雙鯉歸白  
鷺真可人常先孤棹飛高詠江練句令人憶玄暉

又

鏡湖三百里風止鏡面平持以照吾心俗塵安得生散  
髮鷗鷺間萬事秋毫輕誰能拂東絹寫我孤舟橫

又

朝發雲根寺暮宿烟際橋冷螢濕不飛潛魚驚自跳菱  
船歌裊裊荻浦風蕭蕭平明宿鳥起我亦理歸橈

又

古祠照蒼波老木閤雲洞輕舟不搖櫂正用一風送汲

井漱甘液掃榻寓幽夢所恨山未深城笳聽三弄

又

禹穴探斷簡樵風泛清溪倒影森松桂避船散鳬鷺塵  
中有異境十里青玻瓈高塔忽招人湖邊日未低

又

溪行已清秋還舍尚殘暑天公為解圍簾櫳過疎雨青  
蔬喜小摘紅粒亦新杵一飽坐北軒蘋花泣烟渚

劔南詩藁卷三十四

欽定四庫全書

劔南詩藁卷三十五

宋 陸游 撰

浮生

浮生真是寄郵亭  
短髮怱怱失故青  
睡少始知愁有力  
病增方歎藥無靈  
謀生嬾似逢秋燕  
訪舊疎於欲旦星  
自笑若為銷此恨  
濁醪聊復倒餘瓶

秋夜

高屐枯筇一老翁  
燈前自笑髮如蓬  
泠泠月浸荒庭竹  
淅淅風凋古井桐  
病思未蘇秋尚淺  
醉魂初醒夜方中  
故人萬里無消息  
便擬江頭問斷鴻

秋夜紀懷

缺月淡欲盡  
老雞鳴苦遲  
聊為待旦坐  
不作感秋悲  
魯叟一王法  
幽人七月詩  
平生經世志  
老死欲誰期

又

瞿曇起西域  
老氏奮中州  
談理一家說  
蠹民千載憂  
橫

流當有自獨立豈相仇垂世詩書在兒童勿外求

又

北斗垂莽蒼明河浮太清風林一葉下露草百蟲鳴病  
入新涼減詩從半睡成還思散闕路炬火驛前迎

書懷

蕭颯先秋鬢龍鍾未死身不惟今日老已是一生貧食  
菜從兒瘦闕門任客嗔世間餘一念河雒尚烟塵

林居秋日

桔槔引水遶荒畦病卧蝸廬不厭低小聚數家秋靄裏  
平波千頃夕陽西亭臯草木猶蔥蒨天上風雲已慘悽  
逋負如山炊米盡終年枉是把鉏犁

七月二十四日作

閒拂青銅一惘然此生應老海雲邊涼颼入袂詩初就  
幽鳥呼人夢不全天上鵲歸星渚冷月中桂長露華鮮  
射鵬羽箭凋零盡坐負心期四十年

枕上作時聞臨海四明皆大水



撫枕時時猶歎歎  
阨窮已極畏凶饑  
雨聲浙瀝孤齋冷  
客夢蕭條萬里歸  
山邑風雷移蜃穴  
海城水潦半民扉  
如雲秋稼方相賀  
一飽還憂與願違

書懷

漫道年來未極衰  
窮途憔悴實難支  
半分臂減休文瘦  
七尺軀存曼倩飢  
尚憶青衫陪衆雋  
寧期白首負明時  
悠然萬里煙波興  
除却沙鷗總不知

秋陰至近村

村店閒尋酒筇枝瘦倚肩雲齊龍卷雨野曠鶴盤天露  
井飄桐後清觴泛菊前欲歸還小立搔首意悠然

閒居自述

自許山翁嬾是真紛紛外物豈關身花如解笑還多事  
石不能言最可人淨掃明窗憑素几閒穿密竹岸烏巾  
殘年自有青天管便是無錐也未貧

秋雨初霽試筆

墨入紅絲點漆濃閒將倦筆寫秋容雨聲已斷時聞滴

雲氣將歸別起峯斜日半穿臨水竹好風遙送隔城鐘  
遠遊更動輕舟興太息何人解見從

幽懷

苦茅架竹亦吾廬病起幽懷得小攄愛酒已捐身外事  
閉門猶讀死前書鄰家人喜添新犢小市奴歸得早蔬  
但使身安歲中熟敢辭老境落樵漁

雨後出門散步

細水穿沙溜殘雲扶雨歸不成遊酒市且作倚漁扉老

大徂年速羈窮壯志違破裘雖百結猶勝泣牛衣

又

病葉常先賈寒潮只暗生扶衰賴藥石隨意出柴荆細  
路牛欄溼疎籬續火明枯榮不須計千古一棊枰

秋夜示兒輩

吳下當時薄阿蒙豈知垂老歎途窮秋砧巷陌昏昏月  
夜燭簾櫳裊裊風縮項鰕魚收晚釣長腰粳米出新礬  
兒曹幸可團圞語憂患如山一笑空

七十二歲吟

七十人言自古稀我今過二未全衰讀書似走名場日  
許國如騎戰馬時秋晚雁來空自感夜闌酒盡不勝悲  
渭濱星竇逾千載一表何人繼出師

雨夜讀書

風雨須洞吞孤村讀書擁褐不出門歷觀忠邪見肝肺  
直與治亂窮根原傳巖之野感帝夢此事難以今人論  
危冠長劔一見用萬里耕桑吾道尊

又

一燈如螢雨潺潺老夫讀書蓬戶間但與古人對生面  
那恨鏡裏凋朱顏功名本來我輩事人自蹭蹬天何慳  
君看病驥瘦露骨不思仗下思天山

秋晚

聚落蕭條古埭東蘆藩蓬戶卧衰翁井桐葉盡新霜後  
衣杵聲繁夕照中身似敗棋難復振心如病木已中空  
村醪酸澀君無笑也解燈前作臉紅

新菊

已過重陽十日期菊叢初破兩三枝自憐短鬢蕭蕭白

不似黃花驛裏時

黃花驛在岐鳳  
間予嘗過之

又

老去流年不耐催微霜又見菊花開莫言冷落西風晚  
也有飛飛小蝶來

九月二十八日五鼓起坐抽架上書得九域志泣

然有感

一事無成老已成不堪歲月又崢嶸  
愁生新雁寒初下睡起殘燈曉尚明  
天地何由容梗化功名正恐屬書生  
行年七十初心在偶展輿圖淚自傾

題橋南堂圖

平生不識橋南路聞道清流帶煙樹  
今朝開卷一欣然恍若身親到其處  
徐郎獨立疑如山招不能來麾不去  
舊居萬瓦碧浮煙結茅却就橋南住  
雪盡春生水似藍想君清獻釣魚菴  
道上紅塵高十丈斷無一點到橋南



題吳參議達觀堂堂榜蓋朱希真所作也僕少亦

辱知於朱公故尤感慨云

中原遺老雒川公鬢鬚白盡雙頰紅揮毫為君作齋榜  
想見眼中餘子空餘子碌碌何足數獨付莊周賈生語  
看君踐履四十年始知此公不輕許公今度世為飛仙  
開卷使我神凜然清時臺省要才傑諸公誰致雒川客  
舍北搖落景物殊佳偶作

今年冬候晚仲月始微霜野日明楓葉江風斷雁行窮

塗多藉躡老境易悲傷自笑詩情嬾蕭然舊錦囊

又

路擁新霜葉溪餘舊漲沙  
栖鳥初滿樹歸鴨各知家  
世

事元堪笑吾生固有涯  
南村聞酒熟試遣小僮賒

又

小聚鷗沙北橫林鱗舍東  
船頭眠醉叟牛背立村童  
日落雲全碧霜餘葉半紅  
窮鱗與倦翼終勝在池

籠

又

屋角成金字溪流作縠紋斜通小橋路半掩夕陽門孤  
艇衝煙過疎鐘隔塢聞杜門非獨病實自厭紛紛

又

草徑人稀到柴扉手自開林疎鴉小泊溪淺鷺頻來簷  
角除瓜蔓牆隅斲芋魁東鄰腩肉至一笑舉新醅

自嘲

身見紹興初改元百懼敢料至今存生涯破碎餘龍具

學問荒唐守兔園獨立未除還笏氣餘生猶待闔棺論  
北牕燈暗霜風惡且置孤愁近酒樽

作夢

作夢今逾七十年平生懷抱尚依然結茅杜曲桑麻地  
覓句灞橋風雪天驃騎向來求作佛淮南末路望登仙  
世間妄想何窮盡輸與山翁一醉眠

夜坐

杳杳霜鐘十里聲娟娟江月半窗明陳編欲絕猶堪讀

微火相依更有情九曲煙雲新散吏

時方被命再領武夷祠祿百年

鈇槩老諸生頽然待旦君無笑尚勝聞雞賦早行

溫岐詩云

雞聲茅店月人迹板橋霜蓋唐人早行絕唱也

### 壯園雜詠

西村林外起炊煙南浦橋邊繫釣船樂歲家家俱自得  
桃源未必是神仙

又

舍北橋東幽事多老夫飯飽得婆婆茅簷日落聞春相

荻浦煙深有櫂歌

又

小橋密接西岡路支徑深通北崦村老子意行無遠近  
月中時打野人門

又

東吳霜薄富園蔬紫芥青菰小雨餘未說春盤供采擷  
老夫湯餅亦時須

又

鉏麥家家趁晚晴  
築陂處處待春耕  
小槽酒熟豚蹄美  
刺與兒童樂太平

又

閒伴鄰翁去荷鉏  
林疏歷歷見村墟  
怪生白鷺飛無數  
水落灘生易取魚

又

短筇行樂出紫荊  
雪意闌珊却變晴  
林際已看春雉起  
屋頭還聽歲猪鳴

又

歲殘已似早春天  
隔水橫林一抹煙  
聞道埭西梅半吐  
攜兒閒上釣魚船

又

白髮蕭蕭病滿身  
凍雲野渡正愁人  
揚鞭大散關頭日  
曾看中原萬里春

又

暮年身似一虛舟  
付與滄波自在流  
垂地雪雲吹不散



且傾桑落膾槎頭

龜堂獨坐遣悶

髮已凋疎齒已搖高談誰與慰無聊苦心雖嘔何由出  
病骨非讒亦自銷玉雪細塵烹瑞草胭脂小把斲靈苗

防風苗色紅如  
臘脂可作蘊

賀公吳語吾能似太息遺魂不可招

又

放逐還山八見春枯顱槁項雪霜新大牀不解除豪氣  
凡眼安能識貴人食有淖糜猶足飽衣存裋褐未全貧

北窗坐卧君無笑拈起烏藤提有神

復竊祠祿示兒子

得飽不啻足閉門還讀書翁猶羹不糝兒固食無魚衮  
繡昌加我簞瓢常晏如人生隨所遇勿替此心初

隴頭水

隴頭十月天雨霜壯士夜枕綠沉槍卧聞隴水思故鄉  
三更起坐淚數行我語壯士勉自強男兒墮地志四方  
裹尸馬革固其常豈若婦女不下堂生逢和親最可傷

歲輦金絮輸邊疆夜視太白收光芒報國欲死無戰場

### 雪歌

黑雲黯黯如翻鴉急霰颯颯疑投沙初聞萬竅號地籟  
已見六出飛天花寧論異事吠羣犬且喜和氣連千家  
穿簾投隙矜嫵媚平坑塞谷迷谿谷遙遙林塢出玉筍  
渺渺江路蟠脩蛇扣門方擬貰鄰酒篝火更欲尋僧茶  
懸知朝士集闕角靴聲入賀趨正衙吾衰久矣尚何說  
所幸一稔均幽遐

春近

短褐枯筇老病身  
龍鍾也復喜新春  
已知不解多年住  
且作都無一事人  
簷角鳥聲呼醉夢  
室中花氣襲衣巾  
朝來更有欣然處  
一筋山蔬勝八珍

望永阜陵

聖主乘乾臨斧扆  
小臣承詔上丹墀  
寧知齒豁頭童後  
更遇天崩地陷時  
泣至眼枯無血續  
夢隨魂斷獨心知  
白頭才盡空濡筆  
寧繼生民下武詩

初拜再領祠宮之命有感

黃紙初開喜可知  
追懷平昔却成悲  
生當京國承平日  
仕及皇家再造時  
小草出山初已誤  
斷雲含雨欲何施  
兒孫賀罷仍無事  
却赴幽人把釣期

醉中信筆作四絕句  
既成懼觀者不知  
野人本心也  
復作一絕

麥野桑村有酒徒  
過門相覓醉相扶  
朱門日日教歌舞  
也有儂家此樂無

又

過得一日過一日人間萬事不須謀鄰家幸可賒芳醞  
紅藥何曾笑白頭

又

今朝賣穀得青錢自出街頭買鼠肩草火燎來香滿屋  
未容下筯已流涎

又

老覺人間足畏塗怕人渾似怕於菟晴明頗動青鞵興

先探門前有客無

又

治道巍巍本易成  
狂言安得略施行  
太平事業人皆見  
不計封倫死與生

臘月十九日午睡覺復酣卧至晚戲作

枕痕著面眼芒羊  
欲起元無抵死忙  
擁被却尋初斷夢  
掩屏重撥欲殘香  
雪雲雖散寒猶緊  
春意將回晝已長  
老去此身無著處  
華胥真恐是吾鄉

睡起至園中

春風忽已遍天涯老子猶能領物華  
淺碧細傾家釀酒小紅初試手栽花  
野人易與輸肝肺俗語誰能挂齒牙  
更欲世間同省事勾回蟻戰放蜂衙

北園籬外放步

北園西出路逶迤荆作門扉枳縛籬  
鋤麥正忙人滿野營巢未定鵲爭枝  
招呼父老嘗新釀約束兒童築壞陂  
遇興閒行便終日隔溪績火已參差



歲暮獨酌感懷

明時頻忝武夷僊  
俯仰人間只自憐  
總角回思如昨日  
挂冠過限已三年  
病多晴日思行藥  
睡少清宵學坐禪  
更歎衰孱不禁酒  
地黃一盞即頽然

盆池

雨送疎疎響  
風吹細細紋  
猶稀綠萍點  
已映小魚羣  
傍有一拳石  
又生膚寸雲  
我來閒照影  
一笑整綸巾

對食

蓬蘽生庭葉擁堦經旬飯豆爨枯蕪烟霄舊謂行夷路  
薪水今悲繫病懷夢裏百年元易過人間萬事苦難諧  
癡兒自墮闍黎計歡喜聞鐘已過齋

蹭蹬

少慕功名頗自奇一生蹭蹬鬢成絲市樓酒美貧何預  
斗柄春回老不知黑幟遊魂應有數白衣効命永無期  
魚梁東畔牛欄北舉世誰能識此悲

海棠圖

人間竒草木天必付名流菊待陶元亮竹須王子猷我  
為西蜀客辱與海棠遊再見應無日開圖特地愁

丁巳正月二日雞初鳴夢至一山寺名鳳山其尤  
勝處曰味軒予為賦詩既覺不遺一字

已窮阿閣勝更作味軒遊不盡山河大無根日月浮吾  
身元是幻何物彊名愁久覓卓菴處是間應可留

初春

誰把鵝黃染柳絲似催鄰曲蹋青期已忘萬里封侯志

但憶千回上樹時  
朝雨池塘光潋灩  
暮烟樓觀碧參差

紫姑

一作行藏

欲問還休去  
身世從來心自知

雨中作

三日雨頻作  
昏昏饒睡眠  
泥深散酒市  
風惡惱燈天  
茅屋松明照  
茶鐺雪水煎  
山家自成趣  
撫枕寄悠然

又

浙浙連江雨  
惜惜一室幽  
茶甘留齒頰  
香潤上衣裘  
泥滓將雛鴨  
林樊喚婦鳩  
短章雖漫興  
聊足散吾愁

又

短鬢白如絲  
梅花似舊時  
掩屏愁入夢  
隱几雨催詩  
病為陰天劇  
春緣閨歲遲  
非關畏車馬  
衰甚實難支

縱筆

氣本充天地  
書非汗馬牛  
人人見堯舜  
世世有巢由  
朝市紅塵鬧  
山村白髮稠  
所欣吾道在  
江漢古東流

題慧老芋巖

煨芋當時話  
已新如今拈  
出更精神  
十年相國非  
吾願

半顆君當別付人

立春日

江花江水每年同春日春盤放手空天地無私生萬物  
山林有處著衰翁牛趨死地身無罪梅發京華信不通

數片飛飛猶臘雪村鄰相喚賀年豐

去冬無雪今年以正月十日巳時立

春而平坦有雪數片猶臘雪也

病中作

老軀百病集頽然仰天呼汝病勿怨天藥石幸可扶寓

形天地間疾病誰能無不從酒色來病自無根株但使  
元氣在雖劇行當蘇哀哉忿慾子永棄元化爐

又

牧羊知治民解牛得養生一理儻造微何事不可明我  
老抱病久頗窺古人情唐堯授四時帝道所以成周家  
七百年王業本農耕造端無甚奇至今稱太平人生正  
如此默默要無營心君但高拱萬物安能撓

立春日

花壓烏巾酒滿卮舊逢春日恨春遲如今病卧孤村裏  
過了新春也不知

又

慶元丁巳春來晚人日初過近上元空對一樽三太息  
無人為戴縷金幡

北望

中原墮沙塵北望但莽莽者年死已盡童稚日夜長往  
來多異服寧復記疇曩豈無豪俊士憤氣塞穹壤我欲



友斯人悲詫寄遐想夢行黃河濱雲開見仙掌

上元夜作

百年古謂風前燭我逾七十飯不足亦知生世無工拙  
久向人間耐榮辱今年上元燈滿城十里東風度絲竹  
蓬窗溼薪不禦寒獨取殘書伴兒讀忽然得意見古人  
半碗凍齏甘勝肉書生蓋棺事未定論著儻存終見錄  
富貴無名豈勝數意氣空能驕世俗君不見拄天拄地  
邢君牙不如詩人窮瞎張太祝

暮春

季子黃金盡安仁白髮新無情五更雨便送一年春難  
續西樓夢空存北陌身海棠應似舊惆悵又成塵

又

綠葉枝頭密青蕪陌上深江山妨極目天地入孤吟身  
已雙蓬鬢家惟一素琴世情君莫說頭痛欲漈漈

讀書

兩眼欲讀天下書力雖不迨志有餘千載欲追聖人徒

慷慨自信寧免愚置書不讀談虛無誰其始為此創疽  
古時澤被禽與魚博施所以為唐虞正使老釋信不誣  
為我未免近楊朱高軒大旆塞路衢臺閣尊顯來于予  
安得禹臯日陳謨沾濡四表無焦枯坐令事業見真儒  
老農不恨老耕鉏

枕上作

龍鍾七十豈前期矮帽枯筇與老宜愁得酒卮如敵國  
病須書卷作良醫登山筋力雖猶健閉戶工夫頗自奇

今日快情春睡足卧聽簷鳥語多時

書志

往年出都門誓墓志已決況今蒲柳姿俛仰及大耋妻  
孥厭寒餓鄰里笑迂拙悲歌行拾穗幽憤卧齧雪千歲  
埋松根陰風蕩空穴肝心獨不化凝結變金鐵鑄為上  
方劒釁以佞臣血匣藏武庫中出參髦頭列三尺粲星  
辰萬里揚鴻烈君看此神奇強敵何足滅

夜賦

簷滴新春雨窗昏半夜燈病無詩一字窮賴酒三升

郡中

月設折酒九斗  
日恰得三升

世路澀如棘祠官冷欲冰殘年只此是

年少解飛騰

### 晚步

晚步清溪上微陰忽快晴  
鴉棲先小泊魚暖已羣行  
藥餌扶垂老耕桑樂太平  
非關戀鄉社久客倦遐征

### 漁歌

斜陽收盡暮烟青  
嫋嫋漁歌起遠汀  
商略野人何所恨

數聲哀絕不堪聽

殘夢

少時鐵馬蹴河水老去摧藏百不能  
風雨滿山窗未曉只將殘夢伴殘燈

書憤

白髮蕭蕭卧澤中祇憑天地鑒孤忠  
阨窮蘇武餐羶久憂憤張巡嚼齒空  
細雨春蕪上林苑頽垣夜月洛陽宮  
壯心未與年俱老死去猶能作鬼雄

又

鏡裏流年兩鬢殘寸心自許尚如丹  
衰遲罷試戎衣窄  
悲憤猶爭寶劍寒  
遠戍十年臨的博  
壯圖萬里戰皋蘭  
關河自古無窮事  
誰料如今袖手看

小舟遊西涇度西岡而歸

小雨重三後餘寒百五前  
聊乘瓜蔓水閒泛木蘭船  
雪暗梨千樹煙迷柳一川  
西岡夕陽路不到又經年

春行

九日春陰一日晴強扶衰病此閒行猩紅帶露海棠溼

鴨綠平堤湖水明

杜子美曉看紅溼處花重錦官城李太白蜀江紅且明用溼字明字可謂

奪造化之功世未有拈出者

酒賤柳陰逢醉卧土肥稻壟看深耕山

翁莫道渾無用解與明時說太平

姜總管自築墓舍名繭菴求詩

君不見贅翁退隱真皇時繭室遺名星日垂雖無豪士  
千車送不媿高人一錡隨又不見貞觀故人有王顯抵  
老摧頽不作繭一時戲語今尚存人生窮達誰能免繭



菴知君出游戲壽過期頤乃常事青松手種三千本會  
看半空翻鼓吹人老則衰君不然快瀉玉船鯨吸川釣  
璜遠祖應相似八十方為筮仕年

湖上今歲遊人頗盛戲作

龍船看罷日平西柳閣花穠步步迷射的山前朱舫小  
樵風涇上紫騮嘶

又

畫船鼓吹載涼州不到三更枉出遊忽有歌聲出霄漢

誰家開宴五雲樓

又

翠阜青林烟壘重朱樓畫閣雨空濛禹祠西走蘭亭路  
一片湖山錦繡中

又


臺府官醅歲歲新蘭亭春勝鏡湖春三山小瓮雖堪笑  
也向湖邊作醉人

賞花至湖上

吾國名花天下稀  
園林盡日敞朱扉  
蝶穿密葉常相失  
蜂戀繁香不記歸  
欲過每愁風蕩漾  
半開却要雨霏微  
良辰樂事真當勉  
莫遣匆匆一片飛

暮春

數間茅屋鏡湖濱  
萬卷藏書不救貧  
燕去燕來還過日  
花開花落即經春  
開編喜見平生友  
照水驚非曩歲人  
自笑籌邊心尚在  
憑高慷慨欲忘身



劔南詩藁卷三十五